

Strategi pulih hutan diumumkan

KUALA LUMPUR, Selasa — Datuk Musa Hitam hari ini mengumumkan beberapa strategi penting, termasuk pemberian pinjaman tanpa faedah kepada Kerajaan Negeri, untuk memulihkan sumber hutan negara dan pembukaan ladang hutan seberapa segera.

Timbalan Perdana Menteri merangkap pengerusi Majlis Tanah Negara (MTN), memberitahu satu sidang akhbar di Bangunan Parlimen hari ini, segala strategi itu akan dilaksanakan segera demi kepentingan sumber perhutanan negara yang berterusan di masa akan datang.

Bellau menegaskan semalam, sekiranya kadar pengeluaran pembalakan tahunan seluas 800,000 ekar setahun berterusan, Malaysia akan kehabisan sumber perhutanan di pertengahan dekad 90an.

Di antara strategi penting yang diluluskan oleh Majlis Tanah Negara dalam sidangnya hari ini, termasuklah projek besar-besaran menanam semula kawasan hutan simpan kekal menerusi projek ladang hutan.

Menurut Datuk Musa, Kerajaan Pusat akan menyediakan peruntukan sewajarnya dan secukupnya untuk pelaksanaan projek ini di peringkat Negeri.

Pinjaman itu akan diberikan tanpa faedah langsung dan tempoh pembayaran baliknya ialah selama 25 tahun, termasuk 15 tempoh kelonggaran.

"Ini membayangkan betapa seriusnya Kerajaan Pusat dalam usahanya menjamin sumber perhutanan negara yang berterusan," katanya.

Sesuai

Kawasan yang sesuai untuk projek ladang hutan ini akan ditentukan dan Kerajaan Pusat menerusi Jabatan Perhutanan akan melaksanakan projek ini mengikut perjanjian yang di tandatangani dengan Kerajaan Negeri, di seluruh Semenanjung.

Datuk Musa juga mencadangkan agar projek ini diperluaskan ke Sabah dan Sarawak tidak lama lagi.

Menerusi projek ladang hutan ini, pihak pemerintah akan menanam pokok jenis cepat tumbuh dan dapat "dituai" dalam jangka masa yang singkat.

Antaranya, adalah pokok jenis pines yang boleh dituai dalam tempoh 10 hingga 15 tahun, jenis yamani yang boleh menggantikan jenis meranti dan lain-lainnya.

Di samping itu, Kerajaan juga akan mengandakan proses pemulihan hutan. Umpamanya, tahun lalu hanya 100,000 ekar setahun dapat dipulihkan dan ini akan



● DATUK MUSA

mehjadi 200,000 ekar setahun dalam tempoh Rancangan Malaysia Keempat.

Timbalan Perdana Menteri berkata, Malaysia mempunyai wang yang cukup untuk membiayai projek pemulihan ini tetapi sekarang hanya 25 peratus dari kawasan yang perlu dihutan semula sudah dapat dilaksanakan sewajarnya.

Selanjutnya, Datuk Musa menghuraikan usaha-usaha mengurangkan kadar penebangan tahunan dari kawasan hutan simpan kekal di Semenanjung Malaysia.

Seperti yang dipersetujui oleh Majlis Tanah Negara hari ini, Kadar-Catutan Tebangan Tahunan dalam tempoh RKM adalah sebanyak 185,000 ekar sahaja setiap tahun.

Dari jumlah itu, edaran tebangan bagi jenis kayu yang 'matang' dalam tempoh 30 tahun adalah seluas 103,000 ekar setahun, sementara bagi jenis kayu yang "matang" dalam tempoh 55 tahun adalah seluas 82,000 ekar setahun.

Jumlah Kadar Catutan Tebangan Tahunan bagi RKM itu adalah bagi keseluruhan negeri di Semenanjung Malaysia.

Kerajaan Negeri akan diminta melaporkan segala perkembangan, kemajuan serta masalah mengenai pemulihan hutan ini kepada Kerajaan Pusat untuk mendapatkan penyelesaian sewajarnya.